

ПРАВИЛО ЧТЕНИЯ АКАФИСТА

Молитвами святых отец наших, Господи Иисусе Христе, Боже наш, помилуй нас. Аминь.

Слава Тебе, Боже наш, слава Тебе.

Царю Небесный ...

Святой Боже, Святой Крепкий, Святой Безсмертный, помилуй нас *(трижды, с крестным знаменем и поясными поклонами)*.

Слава Отцу и Сыну и Святому Духу, и ныне и присно и во веки веков. Аминь.

Пресвятая Троице, помилуй нас. Господи, очисти грехи наша. Владыко, прости беззакония наша. Святой, посети и исцели немощи наша, имене Твоего ради.

Господи, помилуй *(трижды)*.

Слава Отцу и Сыну и Святому Духу, и ныне и присно и во веки веков. Аминь.

Отче наш, Иже еси на небесех. Да святится имя Твое. Да приидет царствие Твое. Да будет воля Твоя, яко на Небеси и на земли. Хлеб наш насущный даждь нам днесь. И остави нам долги наша, яко же и мы оставляем должником нашим, и не введи нас во искушение, но избави нас от лукаваго.

Господи, помилуй. *(12)*

Слава, и ныне.

Приидите, поклонимся Цареве нашему Богу. *(Поклон)*

Приидите, поклонимся и припадем Христу, Цареве нашему Богу. *(Поклон)*

Приидите, поклонимся и припадем Самому Христу, Цареве и Богу нашему. *(Поклон)*

Псалом 50

Помилуй мя, Боже, по велицей милости Твоей, и по множеству щедрот Твоих очисти беззаконие мое. Наипаче омой мя от беззакония моего, и от греха моего очисти мя. Яко беззакония моя аз знаю и грех мой предо мною есть выну. Тебе Единому согреших, и лукавая пред Тобою сотворих, яко да оправдишися во словесех Твоих и победиши, внегда судити Ти. Се бо, в беззакониих зачат есмь, и во гресех роди мя мати моя. Се бо, истину возлюбил еси, безвестная и тайная премудрости Твоя явил ми еси. Окропиши мя иссопом, и очищуся, омыеши мя, и паче снега убелюся. Слуху моему даси радость и веселие, возрадуются кости смиренныя. Отврати лице Твое от грех моих, и вся беззакония моя очисти. Сердце чисто созижди во мне, Боже, и дух прав обнови во утробе моей. Не отвержи мене от лица Твоего, и Духа Твоего Святаго не отыми от мене. Воздаждь ми радость спасения Твоего, и Духом Владычним утверди мя. Научу беззаконныя путем Твоим, и нечестивии к Тебе обратятся. Избави мя от кровей, Боже, Боже спасения моего, возрадуется язык мой правде Твоей. Господи, устне мои отверзеши, и уста моя возвестят хвалу Твою. Яко аще бы восхотел еси жертвы, дал бых убо, всесожжения не благоволиши. Жертва Богу дух сокрушен, сердце сокрушенно и смиренно Бог не уничижит. Ублажи, Господи, благоволением Твоим Сиона, и да созиждутся стены Иерусалимския. Тогда благоволиши жертву правды, возношение и всесожегаемая, тогда возложат на олтарь Твой тельцы.

АКАФИСТ ПРЕСВЯТЕЙ БОГОРОДИЦЕ В ЧЕСТЬ ИКОНЫ ЕЯ «ВОСПИТАНИЕ»

Кондак 1

Взбранной Воеводе и усердной Воспитательнице рода христианскаго, яко избавльшися от злых, благодарственная восписуем Ти раби Твои, Богородице, но яко имущая державу непобедимую, от всяких бед наших чад свободы, да зовем Ти:

Радуйся, благая Воспитательнице, воспитанная во святая святых.

Икос 1

Ангела с небесе послати чадом нашим исходатайствуй, Пресвятая, у Сына Твоего и Бога нашего, якоже и Тебе послан бысть Гавриил архангел, и сподоби ны взывати Тебе сице:

Радуйся, рождением Своим родителей обрадовавшая; радуйся, со слезами многими у Бога испрошенная.

Радуйся, молитвы и поста светлое прозябение; радуйся благочестивыя жизни красный плоде.

Радуйся, от младенства святаго послушания исполненная; радуйся благочестием от сосца матерню напоенная.

Радуйся, любви всесветлое жилище; радуйся, милостей Господних сокровище.

Радуйся, благая Воспитательнице, воспитанная во святая святых.

Кондак 2

Видящи наше слезное родительское моление, умилосердися, Владычице, о чадах наших, возми их под Свой честный и благосветлый покров, да воззовут в весели Богу: Аллилуиа.

Икос 2

Разум чадом нашим низпосли, еже како добре Ти послужити, и наполни сердца их премудростию небесною, подаючи едину ю

возлюбити, земное же презрети, и не возбрани устом нашим взывати таковая:

Радуйся, детство Свое при храме проведшая; радуйся, во святая святых возшедшая.

Радуйся, единому Богу посвященная; радуйся, молившаяся Ему день и ночь.

Радуйся, чистоту и целомудрие измлада возлюбившая; радуйся, смирение свое всеусердно охранявшая.

Радуйся, молитвою к Богу присно пламеневшая; радуйся, похвало и радости родителей святых.

Радуйся, благая Воспитательнице, воспитанная во святая святых.

Кондак 3

Сила Вышняго да осенит чада наша Твоего ради неусыпного предстательства за них пред Сыном Твоим, да познавше Твое Матернее милосердие ко всем с верою притекающим к Тебе, воззовут Богу: Аллилуиа.

Икос 3

Имуще от Бога чад наших, не хотим зрети их в геенне огненной пребывающих, но записанных в книзе животней. Сего ради, Пречистая Дево, приклонися ко гласу моления нашего, взывающему Тебе:

Радуйся, Мати Бога и Слова; радуйся святая святых большая.

Радуйся воспитательнице Сына Божия; радуйся, кормилице Господа сил.

Радуйся, яко раждаеши Спасителя мира; радуйся, яко растиши Избавителя плененным.

Радуйся, яко носиши Наставника заблудшим; радуйся, яко Сын - Твой Господь.

Радуйся, благая Воспитательнице, воспитанная во святая святых.

Кондак 4

Бурю видяще соблазнов многообразных, умножившихся, яко песия мухи и скнипы, в пределех наших, к Тебе, Благодатная, взываем о чадех своих, да избегнут сих и вопиют Богу: Аллилуиа.

Икос 4

Слышаще глас Твой, глаголющий Сыну Твоему: Прими всякаго молящагося Тебе и призывающа имя Мое на помощь, - простираем руце наша на молитве к Твоему милосердию, да возмещи чад наших под покров Свой и исполниши прошения наша таковая:

Радуйся, от уныния злаго чад наших избавляющая; радуйся, от безумнаго веселия их ограждающая.

Радуйся, в несении креста их укрепляющая; радуйся, в подвизах благочестия их утверждающая.

Радуйся, под покровом Твоим милостиво их сохраняющая; радуйся, здравие душ и телес им подавающая.

Радуйся, усердная Наставнице целомудрия; радуйся, милостивая Взыскательнице заблудших.

Радуйся, благая Воспитательнице, воспитанная во святая святых.

Кондак 5

Боготечная Звезда утренняя, Сын Твой, Пресвятая Дево, да возсияет светом невечерним в сердцах чад наших, во еже воззвати им Богу: Аллилуиа.

Икос 5

Видящи наше прилежное моление, не отврати лица Твоего от чад наших, аще и отвратятся Тебе, и услыши глаголы уст наших, вопиющих таковая:

Радуйся, яко научаеши чад наших имети разум на доброе; радуйся,

на пути греха их запинаящая.

Радуйся, право шествовати их наставляющая; радуйся, от лукавства злых человек их ограждающая.

Радуйся, в злострадании их укрепляющая; радуйся, благодарити Бога за все научающая.

Радуйся, благая Ходатаице присно о чадах наших к Сыну Своему; радуйся, Споручнице их пред Творцом и Богом.

Радуйся, благая Воспитательнице, воспитанная во святая святых.

Кондак 6

Проповедует весь мир христианский Твое всегдашнее заступление о молящихся Тебе. Сице и ныне услыши многоболезненное сие родительское моление о чадах наших, во еже звати им Богу: Аллилуиа.

Икос 6

Да возсияет луча благодати в душах чад наших, и, просвещении Тобою, узрят путь, ведущий в живот вечный, и последуют им, сохраняеми под Твоим всемогущим покровом. Сего ради услыши ны, зовущия Ти таковая:

Радуйся, родителей на любовь благу к чадам своим подвизающая, радуйся, сердца чад, во еже родителей своих чтити, умиляющая.

Радуйся, просящим подающая разум; радуйся, верных озаряющая смыслы.

Радуйся, всех скорбящих Радосте; радуйся, умягчение злых сердец.

Радуйся, Отрадо и Утешение; радуйся, прибавление ума.

Радуйся, благая Воспитательнице, воспитанная во святая святых.

Кондак 7

Хотяще чадам нашим вечнаго спасения, со слезами предстоим пред честною Твоею иконною, Владычице, да не презриши моления

нашего, зовущаго Сыну Твоему: Аллилуиа.

Икос 7

Новую покажи милость на чадах наших, Владычице, и неизследимыми судьбами Сына Твоего привлецы их под Свой благодатный покров, да усердно зовем Ти:

Радуйся, воспитание чад наших, во еже огражденным им быти муки вечныя; радуйся, воспитание чад наших, во еже наследовати им блаженство непрестающее.

Радуйся, пробуждение совести чад наших на покаяние; радуйся, питающая их плодами добротолубия.

Радуйся, премилосердая Утешительнице всех скорбящих и обремененных; радуйся, неусыпающая Наставнице всех заблудших и ослепленных.

Радуйся, Судии праведнаго умоление; радуйся, многих согрешений прощение.

Радуйся, благая Воспитательнице, воспитанная во святая святых.

Кондак 8

Странствующе в юдоли сей многоскорбней по морю многомятежному страстей, чада наша где обрящут твердое пристанище, аще не в Тебе, Пречистая? Спутешествуй же им и настави их на путь истинный, да зовут Богу: Аллилуиа.

Икос 8

Всем еси Мати милующая, Пречистая Дево, якоже Христос Спаситель рече Тебе, у креста Его предстоящей: Се, сын Твой, - указуя на избраннаго от человек. Сего ради вручаем чада наша в руке Твои и во смирении зовем Ти:

Радуйся, чад наших благосердая Путеводительнице; радуйся, терния греховных страстей милосердая искоренительнице.

Радуйся, отраду в пустыне греха подающая; радуйся, в минуту

скорби утешающая.

Радуйся, в землю обетования путевождствующая; радуйся, на воде упокоения веселящая.

Радуйся, совершенный разуме наставников и детоводителей; радуйся, благословение домов и семейств благочестивых.

Радуйся, благая Воспитательнице, воспитанная во святая святых.

Кондак 9

Всякаго блага исполни сердца и души чад наших, отгоняючи от них духа злосмраднаго безбожия, нечестия и блудодействия, господствующа в мире сем. Сохрани рабов Твоих в чистоте и целомудрии, да взывают во умилении Богу: Аллилуиа.

Икос 9

Витий суемудренных, лжущих на Твое всемогущее заступление, отжени, Мати Божия, от чад наших, да не поползнутся умом в душетленная учения и не обратятся сердцем в похоти безместныя, но призри на ны, верно вопиющия:

Радуйся, добрым нравом чад наших научающая; радуйся, от злых навыков их избавляющая.

Радуйся, мудрых наставников Твоим рабом посылающая; радуйся, от худых сообществ их отвращающая.

Радуйся, благому учению внимати призывающая; радуйся, суетные басни презирати помогающая.

Радуйся, Божие ко грешным благоволение; радуйся, кающихся пред Господом крепкое заступление.

Радуйся, благая Воспитательнице, воспитанная во святая святых.

Кондак 10

Спасти хотя мир, Христос Бог призва не праведники, но грешники на покаяние. Сего ради молися Сыну Твоему о чадах наших, аще и

уйдут в страну далече, обаче, взысканнии Твоим Матерним заступлением, возвратятся в сокрушении сердца к Отцу Небесному и воззовут Ему: Аллилуиа.

Икос 10

Стеною несокрушимою стани, Небесная Царице, чадом нашим, да Твоим предстательством избегнут змиева приношения, красного в снесь, последи же смертоносного, и возмогут чистым сердцем пети Тебе таковая:

Радуйся, избавляющая чад наших от ядовитого зелия; радуйся, спасающая их от душепагубного пития.

Радуйся, от блудодействия их сохраняющая; радуйся, целомудрию их научающая.

Радуйся, потребление всякаго обольщения; радуйся, избавление всякаго смущения.

Радуйся, трезвения поборнице; радуйся, мудрости ходатаице.

Радуйся, благая Воспитательнице, воспитанная во святая святых.

Кондак 11

Пети Твое неборимое заступление выну сподоби чад наших, да обрящут Тебе крепкую Помощницу, и Твоею благодатию отверзут уста свои воспевати Богу: Аллилуиа.

Икос 11

Светоприемную свещу житие чад наших соделай, да присно горят любовию к Тебе и Сыну Твоему, и не презри ны, зовущия Ти:

Радуйся, дым соблазнов разгоняющая; радуйся, мглу страстей просвещающая.

Радуйся, зрение хранити научающая; радуйся, блюсти чувствования вразумляющая.

Радуйся, щедрот неизреченных Мати; радуйся, побуждающая чад

наших в благоговении Тебе предстояти.

Радуйся, утешение им в скорби живоносное; радуйся, от набега лукавых прибежище непреложное.

Радуйся, благая Воспитательнице, воспитанная во святая святых.

Кондак 12

Благодатию неизреченною Духа Святаго напитай сердца чад наших, еже возлюбити токмо Сына Твоего и Бога и Тебе, Преплагуо Заступницу, да, подвигшися Тобою, зовут Царю всяческих: Аллилуиа.

Икос 12

Поюще Твое милосердие, имже милуеши и питаеши чад наших, молимся: не престай просити о них Сына Твоего, яко вся Тебе возможна суть, и услыши мольбы наша таковыя:

Радуйся, от купели святаго крещения чад наших Восприемнице; радуйся, к свету истины их Путеводительнице.

Радуйся, росу благодати Твоя им подающая; радуйся, млеко истины их питающая.

Радуйся, яко твориши чад наших земныя ангелы; радуйся, яко претворяеши их в небесныя человеки.

Радуйся, наследники Царствия Небеснаго их показующая; радуйся, в обителях небесных их водворяющая.

Радуйся, благая Воспитательнице, воспитанная во святая святых.

Кондак 13

О Всепетая Мати Иисуса Сладчайшаго! Приими малое сие моление о чадах наших в воню благоухания духовнаго и возми их под Твой милосердный покров. Еще же даруй им мыслити, глаголати и творити точию Тебе и Сыну Твоему угодная и послы им в жизни сей привременней вся полезная ко спасению душ их, да воспевают Богу: Аллилуиа.

Этот кондак читается трижды, затем 1-й икос «Ангела с небесе...» и 1-й кондак «Взбранной Воеводе...».

Молитва ко Господу нашему Иисусу Христу

Господи Иисусе Христе, Сыне Божий, молитв ради Пречистыя Твоея Матере услыши нас, недостойных раб Твоих, к Тебе прилежно притекающих. Господи, в милостивей власти Твоей чада наша, раби Твои (*имена детей*). Помилуй и спаси их имене Твоего ради, прости им вся согрешения вольная и невольная, совершенная ими пред Тобою, Господи. Настави их на путь истинный, разум их просвети светом Твоим, сердце согрей любовью Твоею. Господи, благослови их в доме, в учении, в пути и на всяком месте Твоего владычества. Господи, сохрани их под кровом Твоим святым от летящих стрелы, от огня, меча, от смертоносных язвы и от напрасных смерти. Господи, огради их от всех видимых и невидимых врагов, исцели их от всякия болезни, очисти их от всякия скверны и облегчи их душевные страдания. Господи, даруй им благодать Духа Твоего Святаго на многая лета жизни, здравия, целомудрия и благочестия. Господи, умножь и укрепи их душевные и телесные силы, Тобою дарованные им. Даруй Твое благословение чадом нашим на благочестивую и, аще угодно Тебе, семейную жизнь. Господи, даруй нам, недостойными и грешным рабом Твоим (*имена родителей*), благословение на воспитание чад наших и сподоби всех купно достигнути вечнаго Царствия и тамо прославити пречестное и великолепое имя Твое, со Отцем и Святым Духом. Аминь.

Молитва к Божией Матери

О Пресвятая Владычице Дево Богородице, милосердая Мати всех человек, спаси и сохрани под кровом Твоим чад наших (*имена детей*), всех отроков, отроковиц, младенцев и во чреве матере носимых. Покрый их ризою Твоею, соблюди их во страхе Божиим и послушании родителем, умоли Господа нашего и Сына Твоего, да дарует им вся полезная к душевному спасению. Вручаем их Твоему Материнскому смотрению, яко Ты еси Божественный покров рабом Твоим. Аминь.

Тропарь, глас 4

Воспитавшейся во храме во святая святых, одеянной верою и премудростию и безмерным девством, архистратиг Гавриил принесе с небесе целование и, еже: Радуйся, радуйся, Благословенная, радуйся, Препрославленная, Господь с Тобою.

Достойно есть, яко воистинну блажити Тя Богородицу,
Присноблаженную и Пренепорочную и Матерь Бога Нашего.

Честнейшую Херувим и Славнейшую без сравнения Серафим, без истления Бога Слова рождшую, сущую Богородицу, Тя величаем.

Слава Отцу и Сыну и Святому Духу, и ныне и присно и во веки веков. Аминь.

Господи, помилуй (*трижды*).

Молитвами святых отец наших, Господи Иисусе Христе, Боже наш, помилуй нас. Аминь.